



ERasmus in Sprendingen circa Francofurtum natus & educatus fuit. Is cum felici ingenio esset præditus, bonis literis incubuit, & earum magnam sibi notitiam comparauit. Huc accedebat uita pietas, & religionis studium, cum naturali quadam facundia. Itaque Ioachimus elector Brandeburgicus eum suis concionibus præfecit, atque eius doctrinam cupidè audiuit. Inde Erasmus sese Vuitbergam contulit, & Lutheri discipulus existens, tandem Theologiæ Doctor creatus fuit. Postea Magdeburgum uenit, & obsidionis tempore anno 1551 ibi permanens, sua constantia insignis extitit. Id cum Megalopolensis dux cognouisset, eum ad se uocauit, & suæ ditionis Ecclesijs Superintendentem (quem uocant) constituit. Scripsit Erasmus de Spongia Erasmi Roterodami, adeoque quatenus illi cum Lutheri doctrina conueniat ostendit. Carolstadij quoque scripta reprehendit, & inter doctos sibi magnum nomen comparauit. Cum etiam controuersia de cœna Domini passim inter Euangelij doctores augeretur, Erasmus suam quoque sententiam edito libro patefecit, & Lutherum optimè sensisse, contra uerò Zuuinglium errasse conclusit. Itaque multos in ea sententia existentes confirmauit, & suam Ecclesiam uerbo Dei pascendo gnauiter pergit. Anon.